

పేతురు రెగిడ్లి మొదొల్చి ఉత్తుమ్ బారిక్ జలో పేతురు రెగిడ్లి మొదొల్చి ఉత్తుమ్

1 యేసుక్రీస్తు బారికి జలో పేతురు, పొంతు, గలతీయ, కప్పదొకియ, ఆసియా చి బితునియ ప్రదేసిమ్లుతె సొంత టాన్ నెంజిల వేర వేరతెచ తిల నంపజలన్క, రెగిడ్లి ఉత్తుమ్. 2 యేసుక్రీస్తుచి ఇస్తుమ్ రితి తుమ్ ఇండుక మెన, జోచి సువి జలి లోయిక తుమ్చి పాపుమ్ పుంచి జంక మెన, అబ్బిన్ జలో దేముడు * అగ్గె తెంతో ఉచర తుమ్క నిసాన అస్సె, చి దస్సి జతి సెక్తి తుమ్క తంక మెన, తుమ్ జోచయ్ మాస్సుల్ జంక మెన, తుమ్క దేముడుచి సుద్ది తిలి ఆత్మ సుద్ది కెర అస్సె. జలె, ప్రబుచి దయ, జోచి సేంతుమ్ తుమ్క కొత్కు నెంజితె తప్పన్.

దేముడు దిలి రచ్చనచి రిసాచి దయిరిమ్

3 అమ్చొ ప్రబు జలో యేసుక్రీస్తుచొ దేముడు అబ్బొన్క జోబర! జోచి ఎదివాట్ దయక, అమ్క నొవర్ జెర్వ అస్సె. యేసుక్రీస్తు మొర్ను తెంతో అన్నె జీవ్ జా ఉట్లీన్చి రిసా ఆమ్ కి అన్నె జీవ్ జా ఉట్ట పరలోకుమ్తె గెచ్చుమ్దే మెన 4 జివుమ్ తెన్ బెద తిలి ఆసతె అమ్క నొవి జెర్మున్చి రిసా, నే గార్ జతి, కల్తి నెంజిలిసి పరలోకుమ్తె తుమ్క దేముడు దిలి వాట తుమ్క రకితయ్. 5 ఆకర్ దీనల్క పూర్తి డీసుక తెయార్ తిలి రచ్చన తుమ్క నే పిట్టుక మెన, దేముడు ప్రబు జోచి సెక్తిక తుమ్చి నముకుమ్ వాట్ తుమ్క తోడ్ అస్సె.

6 ఆకర్ దీనల్చి రచ్చనచి రిసా తుమ్ సర్ద తెన్ జతను. గని రకుమ్ రకుమ్చ కస్తుమ్ తెన్ అప్పె ఇదిల్ కాలుమ్క తుమ్క దుకుమ్ జయెదె. 7 జేవ్ అర్ల సేడ్డిన్తె కిచ్చొ లాబుమ్ మెలె, తుమ్చి

* 1:2 1:2 రోమియుల్ 8:29-30, ఎపెసు 1:5, 11-12 చి తీతు 1:1 దెక.

నముకుమ్క సత్తిమ్చి గే నెంజె గె తుమ్ జేవ్ అర్ల సేడ్డిన్తె డీసెదె. బజర్క 'సత్తిమ్చి గే నెంజె గే' మెన రుజ్జు తంక మెలె, జేవ్క ఆగితె పరిచ్చ కెరుల. బజార్ జలె, విలువ జలెకి పాడ్ జతి వస్తువ. జలె, తుమ్చి నముకుమ్ బజర్చి కంట ఒగ్గర్ విలువ, చి జా పరిచ్చ జలె, జిన్లె, యేసుక్రీస్తుచి పరలోకుమ్చి ఉజిడి గవురుమ్ పూర్తి డీస్తి ఆకర్ దీన్క జా తుమ్చి నముకుమ్క 'సత్తిమ్చి' మెన, జోచి పరలోకుమ్చి ఉజిడితె గవురుమ్తె తుమ్క జో వాట దెయెదె. ⁸ జోక తుమ్ సొంత అంకివొ తెన్ నే దెకిలెకి, జోక ప్రేమయ్ అస్సున్. జోక అప్పె దెకుక నెంజెలె కి, జోక నంపజా అస్సున్, చి మాన్సు అర్దుమ్ కెరుక నెత్తిర్తి పరలోకుమ్చి ఎదివాట్ సర్దనంతోసుమ్ తుమ్చి పెట్టి బెరయ్ అస్సు. ⁹ తుమ్చి జా నముకుమ్చి రిసొ, తుమ్చ ప్రానుమ్క రచ్చన తుమ్క దొర్కు జా అస్సె.

¹⁰ తుమ్క దొర్కు జతి ఈంజ రచ్చనచి రిసొచ దేముడుచ కబుర్లు పూర్లుమ్ సంగిలన, ఈంజయి రచ్చనచి రిసొ ఒగ్గర్ పుసితె తిల. ¹¹ కిచ్చొ పుసెల మెలె, "అమ్చి పెట్టి క్రీస్తుచి ఆత్మ సంగిల జో సేడుక తిల బాదల్ జో వడ్డొక గవురుమ్ జంక తిలిసి కేన్ సమయుమ్క జర్గు జంక, కిసి సమయుమ్క జర్గు జంక అస్సె?" మెన పుసెల. ¹² దేముడు జోవయింక దెకయ్లన్. కిచ్చొ దెకయ్లన్ మెలె, జేవ్ జా కబుర్ సంగితి సేవ కెర్తిక జోవయించి రిసొ నాయ్, గని తుమ్చి రిసొయి మెన దేముడు జోక దెకయ్లన్[†]. జా సుబుమ్ కబుర్ తుమ్ రచ్చించువ జతిన్చి రిసొ, పరలోకుమ్ తెంతో తెద్రయ్లి దేముడుచి సుద్ది తిలి ఆత్మచి తెడి, తుమ్క సుబుమ్ కబుర్ బోదన కెర్ల మాన్సుల్చి అత్తి జానయ్తెయ్. జా సుబుమ్ కబుర్తె తిలిసి ఎత్కి పూర్తి అర్దుమ్ కెరనుక పరలోకుమ్చ దూతల్ కి ఒగ్గర్ ఆస తెన్ అస్తి.

[†] **1:12** 1:12 మెలె, జేవ్ పూర్లుల్చి కాలమ్ నాయ్, గని వడ్డొ అయ్లనచి కాలమ్ యేసు బార్ జంక తిలి, చి ఎక్కి యూదుల్ నాయ్, గని యూదుల్ నెంజెలన కి యేసుచి తెడిచి రచ్చన నజనుక ఈంజయి కాలమ్ అవ్కాసుమ్ దొర్కు జలి. రోమియల్ 11:11, 25, గలతీయల్ 3:8, 9, 14, ఎవెసు 3:6, చి పేతురు రెగిడ్డి ఏక్ నంబర్ ఉత్త్రమ్ 1:20 దెక.

దేముడుచి సుద్దిచి రితి ఇండ

13 జలె, ప్రబు జలో యేసుతెచి రచ్చన తుమ్కయ్ దొర్కు జలి రిసా, తుమ్చ మెన్సు తుమ్ డిట్టుమ్ కెరన, నే మచ్చిల్ రితి, ముద్దొ కెరన, తెలివి తా, జో అన్నె ఉత్ర జా జోచి పరలోకుమ్చి ఉజిడి గవురుమ్ పూర్తి డిస్తి ఆకర్ దీసిచి రిసా ఆస తా, తుమ్క దెతి దయచి రిసా ఉచర, జా రచ్చన కచితుమ్ దొర్కు జతి రితి పూర్తి దయిరిమ్ జా, జయ్యు నముకుమ్ పూర్తి డిట్టుమ్ దెరన. 14 జో ప్రబుచి ఇస్తుమ్ నిదానుమ్ కెర్త బోదల్ జా, తుమ్ అగ్గె నేన్లి పొదిచ తిల ఆగ్గెచి గార్ ఆసల్ రితి తుమ్ ఇండ నాయ్. 15 తుమ్క నిసాన బుకాల్లోసా కీసి పూర్తి సుద్ది అస్సె గే, తూమ్ కి కిచ్చొ కామ్తె కి కెయెక తెయెక దస్సి సుద్ది తెన్ ఇండ. 16 దేముడుచి కొణెతె,

‡“ఆవ్ కీసి సుద్ది అస్సి గే,
తుమ్ కి ఇసి సుద్ది తంకయ్”
మెన రెగిడ్లన్.

17 కక్కయ్ మొకమాటుమ్ నే దెకితో, ఎత్కి మాన్సుక జేవ్ కెర్ల కమొ కొల్లి తీర్పు కెర ‘చెంగిల్’ గే ‘గార్’ గే నంగితొసాక ‘అబ్బొ’ మెన ఉంక్రయ్తను జలె, ఈంజ తుమ్చి సొంత టాన్ నెంజిలిన్తె తుమ్ గడియ జితె పొది జోవయించి మరియాద దెకయ్తి రితి జాగర్త తెన్ నిదానుమ్ ఇండ.

18 తుమ్చ పూర్తుల్ దిలి అగ్గెచి కామ్క నెంజిలి ఇండుక తెంతో, తుమ్ విడ్డల్ జంక మెనయ్ దేముడు ప్రబు తుమ్క నెతోవల్లొ మెన జాన్సు. కీసి నెతోవల్లొ మెలె, వెండి గే బజార్ గే దన పాడ్ జత పస్తువల్ దా గెనె నాయ్, 19 గని కిచ్చొ గార్ నెంజిలి కిచ్చొ మచ్చల్ సర్దల్ నెంజిలి

‡ 1:16 1:16 లేవీయకాండుమ్ 11:44-45, 19:2, 20:7. § 1:17 1:17 జీవ్ నంపజలన వేర వేరతె నంపజలన నెంజిలనతె జితె తిల, పడ్డొ ‘సొంత టాన్ నెంజిలిన్’ మెలన్క అన్నె కిచ్చొ అర్దుమ్ తయెదె మెలె, పరలోకుమ్ నంపజలనచి సొంత టాన్ జయెదె, చి రిసా బూలోకుమ్క ‘అమ్చి సొంత టాన్ నెంజి’ మెనుక జయెదె. కొరింధిల్క పవులు రెగిడ్లి దొన్ని నంబర్ ఉత్రమ్ 5:1-2, షిలిప్పియల్ 3:20, ఎబ్రీయల్ 11:9, 10, 13.

గొర్రెక బలి దిలి రితి జోచొ పుత్తున్ జలొ క్రీస్తుచి లొయి *నువ దిలన్. 20 ఈంజ లొకుమ్ జెర్మిన్ నే జతె అగ్గె తెంతొ దేముడు అబ్బొసి “క్రీస్తు రచ్చించుప కెర్తొసొక తెద్రయిందె” మెన నిసొన్ల తిలన్, గని కెయి క్రీస్తు బార్ జలన్ మెలె, తుమ్చి రిసొయి ‘రచ్చించుప జతు’ మెనయ్ ఈంజ ఆకర్ సమయుమ్తెయ్ బార్ జలన్. 21 క్రీస్తుచి రచ్చన నజన తా జోచి తెడి దేముడుచి ఉప్పిరి తుమ్చి నముకుమ్ తియి అస్సున్. “జో రచ్చించుప కెరెదె” మెన, జోచి ఉప్పిరి దయిరిమ్ జా అస్సున్. మెలె, క్రీస్తుక జో మొర్ను తెంతొ జియడ గవురుమ్ కెర్లొచి రిసొ, తుమ్చి నముకుమ్ తుమ్చి దయిరిమ్ దేముడుచి ఉప్పిరి అస్సె.

22 జలె, దేముడుచి సత్తిమ్ కోడు దెరన జా కోడ్ రితి ఇండుక ఒప్పన తుమ్చి ఆత్మక నుద్ది కెరన అస్సున్, చి దస్సి జా తిలె, కిచ్చొ మాయ నెంతె తుమ్ ఏక్ బావొక అన్నెక్లొ ప్రేమ కెరుక జయెదె. జాకయ్, తుమ్చి పెట్టి పూర్తి నిదానుమ్ ఎక్కిలొక ఎక్కిలొ ప్రేమయ్ కెర. 23 తుమ్ నొవర్ జెర్మి అస్సున్. జా నొవర్ జెర్మన్ జలిసి నాసెనుమ్ జతి బి గలిలిసి నెంజె, గని జీవ్ తిలి, కెయిఱ కి తా గెతి దేముడుచి కోడు తెన్ ఈంజ జెర్మన్ తుమ్ జెర్మన్ జలదు. 24 దేముడుచి కోడుతె జో రెద్దవ తిలి రితి,

† “ఈంజ లొకుమ్చ మాన్సుల్ ఎత్తి చివ్వర్చి రితి జతతి,
జోవయించి గవురుమ్ చివ్వర్చ పుల్లొచి రితి జతయ్.

జా చివ్వర్ వాడుప జతయ్,

జేవ్చ పుల్లొ సుకా గెచ్చ గెస్త గెతతి.

25 దేముడుచి కోడు, మాత్రుమ్,

కెయిఱ తెయిఱ తాఱ గెచ్చెదె”

జలె, జీవ్ దెతి తాఱ గెతి జోవయించి కోడు కిచ్చొ మెలె, తుమ్క బోదన కెర్లి సుబుమ్ కబుర్.

* 1:19 1:19 యోహాను 19:17-37, ముక్కిమ్క 34, 37. లూకా 22:44, మత్తయి 26:28, లూకా 22:30, యోహాను 6:53-56. † 1:24 1:24 యెసయా 40:6-8.

2

1 జాకాయ్, దేముడు చెంగిల్ సుదో మెన తుమ్ చక దెక తిలె, కుస్సిదుమ్ ఎత్కి, మోసిమ్బుద్ది ఎత్కి, మాయబుద్ది ఎత్కి, గోస జతిసి ఎత్కి, దూసుప కెర్తిసి, గోస లట్టబ్బిసి ఎత్కి. తుమ్తె తెంతో వెంట గెల. 2 తుమ్చి రచ్చనతె వడ్డితి రిసా, నొవర్ జెర్మిల బోదల్ రిత జా, కిచ్చో వేరచి నే బెదిలి నత్తిమ్ తిలి దేముడుచి కోడు జలి ఆత్మయి దూదుక తుమ్ ఆస జా తంక. 3 జాకాయ్, జా దయచి రచ్చనతె తుమ్ డిట్టుమ్ జా తా.

4 మాన్సుల్ నెసిలో గని దేముడుచి మొక్కె గవురుమ్ తిలో విలువ జలో జివ్ తిలో, జివ్ దెతో *పత్రె తుమ్ జా. 5 జోతె అయ్లె, తూమ్ కి జివ్ తిల పత్రల్ రిత జా, ప్రబుచి ఆత్మతె గేర్ బెద బందితి రితి సుద్ది తిల పూజర్లు జా, దేముడుచి సేవతె బెద, జో యేసుక్రీస్తుచి తెడిచ దేముడు మెన్సితె ఆత్మ బలుల్ దెతస జస్తె. 6 దేముడుచి కొడెతె †“ఈందె, సీయోను డొంగ్రుతె, ఏక్ పత్తుర్క టీచడ్డసి.

అంచి గేరుక బోడిపత్తుర్ జో జా, ఎత్కిక ఆదారుమ్ జయెదె.

జో ఆచ్ నిసాన్లో గవురుమ్ కెర్లో, అంక ఒగ్గర్ విలువ జలోసా జయెదె.

జోవయింక కో నంపజవుల గే,

కచితుమ్ జేవ్ అంచి మొక్కె లాజ్ జంక నాయ్”

మెన రెగ్గ అస్సె. 7 జాకాయ్, తుమ్ నంపజలసక జో విలువ జతయ్.

గని నంపనెంజిలసక జో కీసి జతయ్ మెలె, దేముడుచి అన్నెక్ కోడుతె అస్సె. కేన్ కోడు మెలె,

‡“ ‘కామ్క నెంజె’ మెన కీబందిలస
జో ఏక్ పత్తురు పిట్టవుక మెన ఉచర్లె కి,

* 2:4 2:4 యేసుక్రీస్తుచి రిసా సంగితయ్. లూకా 20:17-18, మత్తయి 21:42-44, మార్కు 12:10, రోమియుల్ 9:32-33. † 2:6 2:6 యెసయా 28:16. ‡ 2:7 2:7 కీర్తనలు 118:22. § 2:7 2:7 ‘దేముడుచి గుడి బందిలస’ మెలె, జోవయింక నంప నే కెర్ల యూదుల్చ వెల్లెల మాన్సుల్. ఎత్కి అదికారుమ్ తిలో దేముడుక బక్తి కెర్ల యూదుల్క సికడ్డస, జేవ్, గని యేసుక ‘జోయ్యి ఎత్కి అదికారుమ్ తిలో దేముడు తెర్తయ్లో క్రీస్తు రచ్చింపవ కెర్లోసా’ మెన ఒప్పునుక నెసిల, మార్గ. మత్తయి 21:42-46 దెక.

జోయ్యి పత్తురు బోడిపత్తుర్ జయి అస్సె”

మెన రెగిడ్లిసి. ⁸ అన్నెక్ కి,

*“నంప నెంజిలన పిసిర్తో పత్తురు జో జయెదె,

జోవయింక సేడయ్తో సాప్త జో జయెదె”

మెన రెగిడ్లిసి. ఈంజ కోడు కిసి నెరవెర్చుప జతయ్ మెలె, ‘జర్గు జయెదె’ మెన అగ్గె తెంతో దేముడు సంగిలి రితి, జోవయించి కోడు నే సూల్లి రిసా జేవ్ నే కెర్లి రిసా వాట్ పిట్టవన్తతి. జయి జోవయించి తీర్పు.

⁹ గని తుమ్క, దేముడు కిసి దెకితయ్ మెలె, ‘ఆవ్ నిసాన్లి సెకుమ్చ’ మెన, ‘అంచి రాజిమ్చ †పూజర్లు’ మెన, ‘అంచి సుద్ది తిల జాతి’ మెన, ‘అంచ సొంత ప్రైజల్’ మెనయ్ జో దెకితయ్. అందర్ తెంతో తుమ్క బుకారా కెర, జోచి పరలోకుమ్చి ఉజిడ్తె గవురుమ్తె బెదయ్లో యెసు ప్రబుచ ఒగ్గర్ వెల్లో కమొచి రిసా తుమ్ సాచి సూనవుక మెనయ్ తుమ్క దస్సి నిసాన అస్సె. ¹⁰ అగ్గె తూమ్ ‘దేముడుచ మాన్సుల్ ఆము’ మెననుక నెతిర్లదు, గని అప్పె దేముడుచ ప్రైజల్ జా అస్సున్. అగ్గెయి తుమ్క కన్కారుమ్ దొర్కు జయె నాయ్, గని అప్పె దేముడు తుమ్క కన్కారుమ్ దెక రచ్చించుప కెర అస్సె.

¹¹ ప్రైమ తిల బావుడ్లు, తుమ్క ఆవ్ కిచ్చొ బతిమాలూ జా సంగితసి మెలె, తుమ్ గడియ తుమ్చి సొంత టాన్ నెంజిలిన్తె అస్సున్. జలె, ఈంజ తుమ్చి సొంత ‡టాన్ నెంజిలిన్తె తుమ్ జితె తా, తుమ్చి ఆత్మచి ఉప్పిరి యుద్దుమ్ కెర్త ఈంజ లోకుమ్చి ఆగుచ ఆసల్ జర్గు నే కెర్లి రితి, తుమ్ ముద్దొ కెరన. ¹² దేముడుక నేన్ల యూదుల్ నెంజిల ఒత్తచ మాన్సుల్తె తా తుమ్ చెంగిల్ బుద్ది తెన్ ఇండ, చి జోవయింతె

* **2:8** 2:8 యెసయా 8:14. † **2:9** 2:9 డీసయ్లిసి 1:6 దెక. ‡ **2:11** 2:11 జేవ్ నంపజలన వేర వేరతె నంపజలన నెంజిలసతె జితె తిల, వడ్డొ ‘సొంత టాన్ నెంజిలిసి’ మెలిన్క అన్నె కిచ్చొ అర్దుమ్ తయెదె మెలె, పరలోకుమ్చి నంపజలనచి సొంత టాన్ జయెదె, చి రిసా బూలోకుమ్క ‘అమ్చి సొంత టాన్ నెంజి’ మెనుక జయెదె. కొరిందీల్క పవులు రెగిడ్లి 2 నంబర్ ఉత్తమ్ 5:1-2, వెలిప్పియుల్ 3:20, ఎబ్రీయుల్ 11:9, 10, 13.

ఏకవేల కోరే తుమ్క 'తప్పుల కెర్తన' మెన దూసుప కెర్లె, తుమ్ సత్తిమ్ ఇండితిన్చి రుజ్జు జేవ్ దెకిలె, ప్రబు తీర్పు కెరుక జెతి దీసిక తుమ్చి రిసా దేముడుక గవురుమ్ కెరుల.

అధికారులక మరియాద దెకుత్

13 ప్రబుచి మరియాద టీవెడ్డి రిసా, ఈంజ లోకుమ్చొ ఎత్తి అధికారిక తుమ్ మరియాద దెక. దేసిమ్క వెల్లో జా ఏలుప కెర్తొసొక కి, 14 'నేరిమ్ కెర్తనక సిచ్చ కెర్తు' మెన జవున్ 'చెంగిల్ కెర్త మాన్సుల్క బవుమానుమ్ దెతు' మెన జవున్ దేసిమ్క ఏలుప కెర్తొసా తెద్దయల అధికారులక కి తుమ్ మరియాద దెక. 15 కిచ్చొక మెలె, తుమ్ సత్తిమ్ ఇండితిన్ తెన్, నేన్ల మాన్సుల్చి వెర్రిక, తప్పు మెన తుమ్ రుజ్జు దెకవ ముద్దొ కెరుక దేముడుచి ఇస్టుమ్. 16 కిగ్గుల్క గొతిమాన్సుల్ జల రిత తుమ్ జియ నాయ్. దసచ నెంజున్. గని 'ఆగ్గుల్చ గొతిమాన్సుల్ నెంజుమ్, చి ఇస్టుమ్ అయ్లి రితి జింక జయెదె' మెన తుమ్ ఉచర నాయ్, దస్సి పాపుమ్తె గెచ్చ నాయ్. గని, దేముడుచ కామ్ కెర్తన, జోచయ్ గొతిమాన్సుల్ రిత జా, జోచి ఇస్టుమ్ రితి తుమ్ ఇండ. 17 ఎత్తిజిన్ మాన్సుల్క తుమ్ మరియాద దెక. బావుడ్లు జల నంపజలన్క ప్రేమ దెక. దేముడుక తుమ్ బియ. దేసిమ్క వెల్లో రానొక గవురుమ్ కెర.

18 గొతిమాన్సుల్ కి జలెకి, తుమ్చ ఎజొమాన్లుక మరియాద దెక. *మెత్తన తా కన్కారుమ్ దెకిత ఎజొమాన్లు జేవ్ జలెకి, కన్కారుమ్ నేన్లన జేవ్ జలెకి జేవ్ సంగిలి కోడు కెర. 19 కిచ్చొక మెలె, తప్పు నే కెర్లె కి, కచి గే అత్తి తుమ్చితె కో అర్ల సేడ దేముడుచి గవురుమ్ టీవెడ్డి రితి ఓర్పుప జలె, జో దేముడు జో మాన్సుక 'చెంగిలొసా చొ' మెనెదె. 20 తుమ్ తప్పు కెర్లి రిసా దెబ్బల్ కయ్లె పొది సేంతుమ్ తెన్ ఓర్పుప జలె, కిచ్చొ పున్నిమ్ నాయ్! గని, తుమ్ సత్తిమ్ కెర్లె కి సిచ్చ సేడ్లె సేంతుమ్ తెన్ ఓర్పుప జలె, దేముడు తుమ్క 'చెంగిలచ'

§ 2:16 2:16 గలతీయల్ 5:1. * 2:18 2:18 ఎవెసు 6:5-10, కొలోస్సియల్ 3:22-4:1.

మెనతయ్. 21 దస్సి సేంతుమ్ తెన్ తుమ్ తంక మెనయ్ దేముడు తుమ్క బుకారయ్ అస్సె. కిచ్చొక మెలె, తుమ్చి పాపుమ్ గెస్సు మెనయ్ క్రీస్తు బాదల్ ఓర్పువ జా, తుమ్ కి జోచ అజ్జుల్తె ఇండుక మెలి కోడు తుమ్క జో వాట్ దెకవ అస్సె. 22 జో, జలె, కెయ్య కిచ్చొయ్ పాపుమ్ కెరె నాయ్. కిచ్చొయ్ మోసిమ్ కోడు లట్టబె నాయ్. 23 మాన్సుల్ జోక దూసువ కెరె, జోవయింక జో దూసువ నే కెరె తుక్లె తిలొ. జోక జేవ్ అర్ల కెరె కి, జోవయింక జో బియడె నాయ్, గని సత్తిమ్ తీర్పు కెరె దేముడు అబ్బొన్చి అత్తి జోచి జీవ్ జో సార్ప కెరె దిలన్. 24 జో యేసు సొంత ఆమ్ కెరె పాపల్ జోచి ఆఁగి వయన, సిలువతె మొర్లన్. పాపుమ్ ముల అమ్చి సొంత ఆత్మక మొర్లె రిత జా సత్తిమ్ ఇండితి రితి అమ్ జింక మెనయ్. జో యేసు కయల దెబ్బలు తుమ్క చెంగిల్ కెరె అస్సె. 25 తుమ్ అగ్గెయి వాట్ పిట్టవన చెదుర్పు జల మెండల్చ రిత జా తిలదు, గని అప్పె తుమ్చ ఆత్మల్ రకితో చెంగిలొ గొవుడుతె అన్నె బుల జా అస్సున్.

3

తేర్బోదల్ బుద్ది ఇండుక

1 తుమ్ తేర్బోదల్ కి, దాక్ కెరన తుమ్చ మున్సర్లుచి అదికారుమ్క మరియాద దెక. తుమ్ దస్సి ఇండిలె, జోవయింతె సగుమ్జిన్ అప్పెచి ఎదక ప్రబుచి కొడె రితి నే ఇండిలెకి, జోవయించ తుమ్ తేర్బొ ప్రబుచి కోడు నే సికడెకి, 2 తుమ్చి సత్తిమ్చి ఇండుక, మరియాదచి ఇండుక, జేవ్ దెక దెక, ప్రబుక నంపజా, మార్పువ జవుల. 3 తుమ్ తేర్బోదలు “*సూటి కెరనుమ్దె” మెలె, మాములుమ్ డీస్తిన్క ముక్కిమ్ నే ఉచరె, సెండి సూటి కెరంతిన్ జవున్, బజార్ గట్ట తియంతిన్ జవున్, చెంగిల చెంగిల పాలల్ బందంతిసి గలంతిసి జవున్ తుమ్ విలువ దెక నాయ్. 4 గని, తుమ్క కిచ్చొ సూటి కెర్పు మెలె, దేముడుచి మొక్కె ఒగ్గర్ విలువ జతి,

* 3:3 3:3 ఎవెసు 6:5-10, కొలొస్సియుల్ 3:22-4:1.

కెయక నాసెనుమ్ నే జతి పేట్చి తెడిచొ మాన్సు ప్రబుచి మెత్తన బుద్ది, సేంతుమ్ బుద్ది జా తుమ్చి పెట్టి తవున్. ⁵ అగ్గెచ పొదులె దేముడుచి ఉప్పిరి నముకుమ్ తిల తేర్బోదల్ జోవయించి నుద్ది తిలి ఆత్మచి నూటిక తెయార్ జా మున్నర్పుల్చి అదికారుమ్క మరియాద దెకితె తిల. ⁶ పూర్గుమ్చి సారా దస్సి మున్సున్ జలో అబ్రాహామ్క 'ఎజోమాని' మెన, జోచి అదికారుమ్క మరియాద దెకితె తిలి. జోచి కోడు నూన్తె తిలి. తూమ్ కి సత్తిమ్ ఇండిలె, తుమ్ కిచ్చొక కి బమ్మ జంక నాయ్, చి జా సారాచ బోదల్ రిత జస్సె.

మున్సుబోదల్ తేర్పివొక కిసి దెకుక

⁷ దస్సి, తుమ్ మున్సుబోదల్, తుమ్చ తేర్దివొక బమ్మ నే కెర్రి బుద్ది తెన్ పోస. జోవయింతెన్ జియ తేర్బోదక తొక్కి సెక్తి తయెదె మెన చిన, తుమ్తె ఎత్తి మున్సుబోద తేర్దిక మరియాద్ దెక. జోవయింక జాకయ్ కిచ్చొక దొగుతెర ఇసి ప్రేమ దెకుక మెలె, తుమ్ ఎత్తి దొగుతెరకయ్ దేముడు జోవయించి దయక జోవయించి రచ్చన వరుమ్చి వాట దా అస్సె. తుమ్ మున్సుబోదల్ తుమ్చ తేర్దివొక ఇసి ప్రేమ దెకిలె, అడ్డు నెంతె దేముడు తుమ్చ ప్రార్దనల్ నూనెదె. తుమ్చ ప్రార్దనల్క అడ్డు నే జతి రితి జోవయింక ఇసి ప్రేమ దెకుత్.

ఎక్కిలోక ఎక్కిలో ప్రేమ తెన్ తంక

⁸ జలె, తుమ్ ఎత్తిజిన్ ఎక్కి ప్రేమయ్ తా, ఎక్కిలోక ఎక్కిలో కన్నారుమ్ దెక, నంపజలన ఎత్తిజిన్క బాబేన్ దెకితి ప్రేమ దెక, ముద్దు కెర, సొంత గవురుమ్ నే ఉచరంతె, ఎక్కి మెన్సు తెన్ తా. ⁹ ఎక్కిలోక అన్నెక్లో అర్ల కెర తిలె, జో అర్ల సేణ్ణోసా అర్ల కెర్లొసాక అన్నె అర్ల కెరుక పోని. ఎక్కిలోక అన్నెక్లో దూసుప కెర తిలె, దూసుప జలోసా, దూసుప కెర్లొసాక అన్నె దూసుప కెరుక పోని. జో ఎక్కిలోక జో అన్నెక్లో 'చెంగిల్ తవున్' మెన దెకున్. తుమ్క దేముడుచి దయ దొర్పు జవున్ మెనయ్ తుమ్ ఇసి ప్రేమయ్ ఇండుక మెనయ్, తుమ్క జో నిసాన అస్సె. ¹⁰ పూర్గుమ్ దేముడుచి కొడెతె రెగ్గయ్లి రితి,

†“నర్ద తెన్ జింక చి చెంగిలి సమయుమ్ దెకుక మెన

కో జలెకు ఇస్టుమ్ జయెదె గే,

జోవయించి చోడి కిచ్చొ గర్చి నే లట్టబ్బి రితి,

జోవయించ ఒట్టొ కిచ్చొ మోసిమ్ నే లట్టబ్బి రితి దెకన్సు.

11 దసొ మాన్సు పాపుమ్ దూరి కెరన సత్తిమ్ ఇండుసు,

సేంతుమ్ చజ సేంతుమ్ ఇండుసు.

12 కిచ్చొక మెలె, పున్నిమ్ ఇండితసక ప్రబు దెకెదె,

జోవయించ ప్రార్దనల్ జో సూనెదె,

గని పాపుమ్ ఇండితసక జో దెకె నాయ్, సూనె నాయ్.”

13 చెంగిల్ కమొ కెర ఇండితి ఆన రితి తుమ్ ఇండితె తుమ్క కో అర్ల కెరుల? కోయి నాయ్! 14 గని, సత్తిమ్ తుమ్ ఇండిలి రిసొ ఏక్

వేల కో జలెకు అర్ల కెర్లె, దేముడు తుమ్క ‘చెంగిల్’ మెనెదె. దస అర్ల కెర్తసక తుమ్ బియఁ నాయ్. జోవయించి రిసొ బమ్మ నే జతె,

15 ‘పరలోకుమ్చొ ప్రబుయి జో’ మెన, తుమ్చి పెట్టి నిదానుమ్ క్రీస్తుక దెతి గవురుమ్ దాస. జో ప్రబుచి రిసొచి తుమ్చి పెట్టిచి దయిరిమ్చి

రిసొ కో “జేవ్చి సత్తిమ్క తుమ్ రుజ్జు దెకవ” మెన కెయఁ జవున్ తుమ్క పుసిలె, సరి జతి జబాబ్ దెంక తెయార్ జా తా. గని, †జబాబ్

దెంక జలె, బడాయ్ నెంతె మరియాద తెన్ లట్టబా. 16 అన్సె, ‘సత్తిమ్’ మెన తుమ్చి పెట్టి జాన్తిసి జర్గు కెర్తి రితి తుమ్ ఇండ, చి క్రీస్తుచి తెడి

తుమ్ సత్తిమ్ ఇండితినచి రిసొ తుమ్క బియడ్డస దూసుప కెర్లె, జేవ్ కెర్త నిందల్క ‘ఆరిచ’ మెన జేవ్ చినన, లాజ్ జవుల.

17 తప్పు కెర్లి రిసొ సిచ్చ జతి కంట, సత్తిమ్ కెర్లి రిసొ సిచ్చ జంక చెంగిలి. తుమ్ సత్తిమ్ కెర్లి రిసొ సిచ్చ జంక ఏక్ వేల దేముడుచి సెలవ్

తయెదె. 18 మెలె, క్రీస్తుక దెకిలె, క్రీస్తు కి దస్సి, జో పూర్తి సత్తిమ్ తిలె కి, పాపుమ్ జలొసక ‘జోవయించి పాపుమ్ గెస్సు’ మెన జో మొర్లిన్ తెన్

అమ్చి పాపుమ్ పూర్తి గెచ్చవయ్ గెలన్. జా కిఎక్కి సుట్టు జో బలి

† 3:10 3:10 కీర్తనలు 34:12-16. ‡ 3:15 3:15 మత్తయి 10:19, మార్కు 13:11,

లూకా 12:12. § 3:18 3:18 రోమియుల్ 6:10, ఎబ్రీయుల్ 7:27, 9:12, 28 చి 10:10 దెక.

జలిసి సరిపుచ్చుప జెయెదె. అమ్క దేముడు అబ్బొన్తె అన్నె కడ ఆన్తి రిసా మొర అమ్చి పాపుమ్ గెచ్చయ్లన్. ఈంజ లోకుమ్చి ఆగ్ రగుమ్క జోక మార్ల, గని జోచి ఆత్మక దేముడు అబ్బొసి జోక అన్నె * జియడ్లన్.

19 జో మొర్లి పొది యేసు కేనె గెలన్ మెలె, బూలోకుమ్క ఎట్టో లోకుమ్తె జేలి జల, ఆకర్ దీసిచి పరిచ్చక సిచ్చక రకిత ఆత్మల్ తిలిన్తె జోవయించి ఆత్మక జో ఉత్త గెచ్చ, దేముడు అబ్బొన్చి కోడు సాడుప కెర్లన్. 20 అగ్గెయి, పూర్లమ్ పొది, † నోవహుచి కాలుమ్తె “అంక నంపజా రచ్చించుప జతు” మెన దేముడు సిచ్చ వాయిద కెర రకిలెకి, జో నోవహు, జా ఓడ బందితె తిలి పొది జోచి కోడు సూనుక నెసిలనచ ఆత్మల్క సుబుమ్ కబుర్ కోడు సాడుప కెర్లన్. జలె, జా ఓడతె తొక్కిజిని, మెలె, ఎక్కి అట్టు జిన్ మాన్సుల్ పానితె రచ్చించుప జల.

21 జా సమయుమ్తె జేవ్ దస్సి పానితె రచ్చించుప జలిసి, జలె, బాప్తిసుమ్క టాలి జతయ్. మెలె, పానితె బాప్తిసుమ్ జతిసి తుమ్క రచ్చించుప కెర్తి గుర్తు జతయ్. కిసి మెలె, తుమ్చి ఆగుచి ముర్కి, దొవన్తిన్చి రిసా నాయ్, గని యేసుక్రీస్తు అన్నె జీవ్ జా ఉట్టి రిసా దేముడుచి మొక్కె తుమ్చి పాపుమ్ గెలి గుర్తుయి బాప్తిసుమ్ దెకయ్తయ్. ప్రబుక నంపజలస జోవయించి బుద్ధి మార్పుప జా ప్రబుకయ్ గవుర్దుమ్ కెర్తి రితి ఇండుక ఇస్టుమ్ జలిన్చి గుర్తు బాప్తిసుమ్తెయి దెకయ్తతి. 22 జలె, జో క్రీస్తు జీవ్ జా ఉట్ట కెర పరలోకుమ్తె వెగ గెచ్చ, దేముడు అబ్బొన్చి ఉజెతో పక్క వెస తా, ‡ దూతల్చి ఉప్పిరి, అదికారుల్చి ఉప్పిరి, సక్తుల్ ఎత్కిచి ఉప్పిరి ఏలుప కెర్లయ్.

* **3:18** 3:18 లూకా 24:39 దెక. ఆత్మ రగుమ్చి ఆగ్ తెన్ యేసు అన్నె జిలన్. కొరిందొల్క పవులు రిగిడ్లి ఏక్ నంబర్ ఉత్తుమ్ 15:44, వెలిప్పియుల్ 3:21. చి ఎల్లియుల్ 10:5 దెక. † **3:20** 3:20 అదికాండుమ్ 6-9 అద్యయల్. ‡ **3:22** 3:22 ఎవెసు 1:21, 6:12, కొలోస్సియుల్ 1:16, 2:10, 15, చి తీతు 3:1 దెక.

4

ఆంగిక బాదల్ సేడ్లె బుద్ది చెంగిల్ జతిన్చి కోడు

1-2 క్రీస్తు, జలె, మాన్సుచి జోచి ఆగుతె బాదల్ సేడ్లెన్. జాకయ్, *‘అమ్ కి జోచి రితి బాదల్ సేడ ఓర్పుప జమ’ మెన తుమ్ డిట్టుమ్ కెరన. కిచ్చొక మెలె, జో తెన్ మెలి రితి ఆగుక కో బాదల్ సేడ తయెదె గే, ఒత్త తెంతో ఈంజ అగి జితె ఎదిలి సేంపుక మాన్సుచ ఆసల్ రితి నాయ్, గని దేముడుచి ఇస్తుమ్ కీసి అస్సె గే, దస్సి ఇండుక మెన, జో మాన్సు పాపుమ్ ముల అస్సె.

3 దేముడుక నేన్లనచి రితిచి తుమ్చి అగ్గెచి ఇండుక అగ్గెయ్చి మెన, తుమ్ దసితె అన్నె గెచ్చు నాయ్. దేముడుక నేన్లన జోవయించి అగ్గెచి ఆస ముద్దో నే కెరంతి రితి, ఆసల్ రితి, మచ్చితి రితి, ‘నర్ల కెర్లనుమ్’ మెన వెట్కారుమ్ జతి రితి, ‘నర్ల కెర్లనుమ్’ మెన సూర్లు పితి రితి, వెట్కారుమ్ జా బొమ్మల్క జొకర్తి రితి జితతి. 4 తుమ్ అప్పె జోవయింతెన్ దన బుద్ది నెంజిల అలవాట్లతె బెదున్ నాయ్ చి రిసా జేవ్ ఆచారిమ్ జా తుమ్క దూసుప కెర్తతి. 5 గని ఆకర్క, మొర్లనక జీవ్ తిలనక తీర్పు కెరుక తెయార్ జలో ప్రబుచి మొక్కె జేవ్ జోవయించి పాపుమ్ ఒప్పున సిచ్చు జంక అస్సె. 6 దస్సికయ్, †మొర్లనక కి సుబుమ్ కబుర్ సూనయ్లో కిచ్చొక మెలె, మాన్సుచి జోవయించి ఆంగిక మాన్సుల్ సేడ్లి జోవయించి పాపుమ్చి సిచ్చు జేవ్ జలెకి, దేముడు జోవయించి ఆత్మక కీసి జితయ్ గే, జేవ్ కి దస్సి జింక అవ్కాసుమ్ తంక.

7 ఈంజ ఎత్కిక ఆకర్ దీసి పాసి జా జెతయ్. జాకయ్, ప్రార్లనల్ కెర్తె తతి రిసా తుమ్ మచ్చిల్ రితి నే జితె తెలివి తా ముద్దో కెరన, బుద్ది ఇండుక జాగర్ల తా. 8 ముక్కిమ్క, ఎక్కిలోక ఎక్కిలో పూర్తి ప్రేమయ్

* 4:1-2 4:1-2 రోమీయుల్ 8:17, వెలిప్పీయుల్ 1:29-30, తిమోతిక పవులు రెగిడ్లి 2 నంబర్ ఉత్తమ్ 2:12. † 4:6 4:6 3:19 దెక.

ఇండ దెకితె తా. దస్సి ప్రేమ దెరన. కిచ్చొక మెలె, †బగ్గర్ తప్పుల్క ప్రేమయ్ ఒర్పువ జా చెమించుప కెర్తయ్. 9 అన్నె, తుమ్చితె ఎక్కిలోతె అన్నెక్లో అయ్లె, కోపుమ్ నెంతె గడ్డు నెంతె, సర్ద తెన్ జోవయింక మరియాద కెర. 10 దేముడు తుమ్క కిచ్చొ సెక్తి దా తిలె, జోచి దయచ, జో దెత వేర వేర సీసెక్తివరల్ పొరపాట్ నెంతె జోచి బుద్ది రితి, అన్నె మాన్సుల్ చెంగిల్ తతి రితి తుమ్ వాడిక కెర దాసా. 11 దస్సి, బోదన కెర్తొసా జలె, దేముడుచి తెడి తా జొయ్యి దిల కొడొ లట్టబ్బు. దస్సి కి, కో అన్నె మాన్సుల్క తోడ్ కెర్తొసా జలె, దేముడు దెతి సెక్తికయ్ జో జా తోడ్ కామ్ కెర్పు. తుమ్ దస్సి ఇండిలెగిన, యేసుక్రీస్తుచి రిసా దేముడుచి గవురుమ్ ఎత్కితె రుజ్జు డీసెదె. కెయఁక తెయఁక జోవయింక గవురుమ్ అదికారుమ్ తవును!

జెత బాదల్ చి రిసా దయిరిమ్ సంగితిసి, జాగర్త సంగితిసి

12 అన్నె, ప్రేమ తిల బావుడ్లు, తుమ్క అప్పె జెతికయ్ ఆగి మెలి రితిచి పరిచ్చుచి రిసా తుమ్ ఆచారిమ్ జా నాయ్. ‘అమ్క దస్సిచి కిచ్చొక లయిక?’ మెన తుమ్ ఉచర్లె, జా జర్గు జతిసి కిచ్చొ ఆచారిమ్చి నెంజె. కిచ్చొక తుమ్క జర్గు జతయ్ మెలె, తుమ్చి నిదానుమ్ పరిచ్చు జా రుజ్జు జంక. 13 ‘క్రీస్తు సేడ్ల బాదల్తె ఆమ్ కి బెదితనుమ్’ మెన తుమ్ సర్దసంతోసుమ్ జా, చి జోచి గవురుమ్ పూర్తి డీన్తి దీసిక ఒత్తయ్ కి జో తెన్ సర్దసంతోసుమ్ జస్తె. 14 “అమ్ నంపజలన” మెన తుమ్ ఒప్పున్లి రిసా మాన్సుల్ తుమ్క దూసుప కెర్లె, తుమ్క చెంగిలి. కిచ్చొక మెలె, దేముడుచి ఉజిడిచి ఆత్మ తుమ్చి తెన్ తా గెచ్చు తుమ్క తోడు తా సెక్తి దెతె తత్తయ్.

15 గని, మాల్టోస్ జలెకి, ‘చోర్టాస్’ జలెకి, ‘నేరిమ్ కెర్తొసా’ జలెకి, ‘వేర మాన్సుల్చి కామ్చి నెడిమి జా పోటి కెర్తొసా’ జలెకి, మెన తుమ్చితె

† 4:8 4:8 ఎత్కి అదికారుమ్ తిలో దేముడు అమ్చ బగ్గర్ తప్పుల్ జోవయించి ప్రేమయ్చి రిసా ఒర్పువ జా చెమించుప కెర్తయ్. దస్సి ప్రేమ అమ్చి పెట్టి తా, అమ్ కి దస్సి అన్నె మాన్సుల్క తప్పుల్ ఒర్పువ జా చెమించుప కెరుక. పడ్డొ, అమ్ దస్సి ప్రేమ కెర్లె. జయి కి జో దెక అమ్క కన్యారుమ్ దెకెదె. మత్తయి 6:12, 14, 15 దెక. § 4:10 4:10 రోమియల్ 12:6-8 దెక.

కక్క కో నింద కెర్తి రితి వాట్ దాస నాయ్. దన కమొ కెర బాద సేడ్త తుమ్క చెంగిల్ నాయ్. 16 గని, 'నంపజలస' మెన తుమ్ ఒప్పన్లి రిసాయి తుమ్చితె కో కచి అత్తి బాదల్ సేడ్లె, లాజ్ జంక నాయ్. 'నంపజలస' మెన జా నావ్ దెరన్లిసి చెంగిల్ మెన, జో నంపజలస దేముడుక గవురుమ్ దెవుసు! 17 కిచ్చొక మెలె, దేముడు మాన్సుల్క పరిచ్చ కెర్తి సిచ్చ కెర్తి సమయుమ్ పాసి జా అస్సె. జలె, జో పరిచ్చ కెర్తిసి తీర్పు కెర్తిసి అమ్ నంపజలసతెయ్ మొదొల్ జతయ్ జలె, దేముడుచి సుబుమ్ కబుర్ రితి ఇండుక నెసిత మాన్సుల్ ఆకర్క కెర్తి సిచ్చ జవుల! 18 జో దేముడు వూర్గుమ్ రెగ్గయ్లి రితి;

*"సత్తిమ్ జలొ మాన్సు †కస్టనె రచ్చించుప జతయ్ జలె, దేముడుక నే బితస, పాపుమ్ కెర్లస, కీసి రచ్చించుప జవుల! రచ్చించుప జంక నెత్తిరి!"

19 జాకయ్, దేముడుక నిదానుమ్ తా జోవయించి సెలవ్క కో ఈంజ లొకుమతె సిచ్చల్ అర్ల సేడ్తతి గే, ఎత్తిక జెర్నున్ కెర్లొ నిదానుమ్ తిలొ జో దేముడుచి అత్తి జోవయించ ఆత్మల్ సొర్పు కెర దా, చెంగిల్ కమొ కెర్తె తత్తు!

5

సంగుమ్చ వెల్లెల మాన్సుల్ కీసి ఇండుక

1 తుమ్చి తెచ సంగుమ్చ వెల్లెల మాన్సుల్క, జలె, ఆవ్ ఏక్ కోడు సంగిదె. తుమ్చి తెన్ కి నంపజలసక ఆవ్ వెల్లొ జలొసా తా, క్రిస్తు సేడ్లె బాదల్ సొంత దెకిలొసా జా, పడ్డొ తెదొడక రుజ్జు జా డీసుక తిలి పరలొకుమ్చి ఉజిడతె గవురుమ్తె బెదితొసా జా, ఆవ్ తుమ్తెచ వెల్లొ మాన్సుక కిచ్చొ బతిమాల్పా జా సంగితసి మెలె, 2 తూమ్ దెకితి వాట దేముడుచ మెండల్ జల నంపజలసక తుమ్ నిదానుమ్ దెకితె తా, తుమ్క కో బలవంతుమ్ కెర్తి రితి నాయ్, గని దేముడుచి ఇస్టుమ్ రితి పూర్తి మెన్సు దా జోవయింక సర్ల తెన్ దెకితె తా. డబ్బుల్ ఆసక

* 4:18 4:18 సామెతల్ 11:31. † 4:18 4:18 కస్టనె మెలె, రచ్చించుప నే జలి రితి జా కీసి గే రచ్చించుప జతయ్.

నాయ్, గని సర్లబుద్ది తెన్ కెరై తా. ³ పడ్డొ, జా మందతెచ మాన్సుల్క బియడ్డి రగుమ్ ఏలుప కెర నాయ్, గని జేవ్ కిసి సత్తిమ్ ఇండుక గే దెకిత్ రితి తూమ్ దస్సి సత్తిమ్ ఇండ దెకవ. ⁴ తూమ్ దస్సి ఇండ వాట్ దెకయ్లదు మెలె, ఎత్కిచి కంట వెల్లో గొవుడు జతో క్రిస్తు ఆకర్ దీసిక ఎత్కిజిన్క డీస్తి పొదిక ప్రబుచి గవురుమ్ నే గెతి బవుమానుమ్ తుమ్ ఎత్కిజిన్క దొర్కు జయెదె.

⁵ పడ్డొ, సంగుమ్క దెకిత వెల్లెల మాన్సుల్చి తెడి తుమ్ అన్నె నంపజలస దాక్ కెరన, జేవ్ వెల్లెల మాన్సుల్చి కోడుక మరియాద కెర. తుమ్ ఎత్కిజిన్ సొంత గవురుమ్ నే ఉచరంతె, ఎక్కిలోచి మొక్కె ఎక్కిలో దాక్ కెరన, ఎక్కిలోచి సేవ ఎక్కిలో కెర. పూర్లుమ్ దేముడుచి కొడతె రెగ్గయ్లి రితి,

*“సొంత గవురుమ్ ఉచరంతసక దేముడు దూరి కెర్తయ్,

గని కో దాక్ కెరనుల గే,

జోవయింకయ్ జోచి దయచి తోడు జో దెయెదె”

మెన రెగిడ్డి కోడు.

⁶ జాకయ్, ఎత్కిచి కంట సెక్కి తిలో దేముడుచి అత్తి తుమ్చి బత్కు సొర్ప కెర దా జోచి తెడి దాక్ కెరన, చి జో ఒప్పన్లి సమయుమ్క గవురుమ్ తెన్ తుమ్క టీచడెదె. ⁷ బాదల్ సేడ్డి తుమ్చి బయిమ్ ఎత్కి జో వయితి రితి తుమ్ సొర్ప కెర దాస. కిచ్చొక మెలె, తుమ్క ‘చెంగిల్ తత్తు’ మెన, తుమ్చ బాదల్ వయిక జో ఇస్తుమ్ జతయ్.

⁸ మచ్చిల్ రితి బుద్ది నే జతె తుమ్ ముద్దొ కెరన, తెలివి తా జాగర్త తా. కిచ్చొక మెలె, తుమ్క నేరిమ్ వయడుక ఇస్తుమ్ జలో సయ్తాన్ కక్క జలెకు గిడుక కోర్వ జా, ఒర్నితో సింపుమ్చి రితి బులితె తత్తయ్.

⁹ ఒండి లోకుమ్చ బావుడ్లు జల నంపజలన్క కి ఇన బాదల్ సేడుక అస్సె మెన జాన, తుమ్చి నముకుమ్ డిట్టుమ్ తా జో సయ్తాన్చి ఉప్పిరి జినుక తుమ్ టీచ. ¹⁰ అన్నె, గడియ బాదల్ సేడ ఒర్పుప జలదు మెలె, క్రిస్తుచి నావ్ తెన్ తుమ్ జోచి కెయక తెయక తతి

* 5:5 5:5 సామెతల్ 3:34, యాకోబు 4:6.

పరలోకుమచి ఉజ్జితే గవురుమతె బెదుక మెన తుమ్క నిసాన బుక్కార్లొ ఎత్తి దయ కెర్తొ దేముడు సొంత తుమ్క పూర్తి కెర, డిట్టుమ్ కెర, జీన్తి సెక్తి దెయెదె. ¹¹ జో కెయక తెయక ఏలుప కెర్న! ఏలుప కెరెదె. జోక జోబర! ఆమేన్.

ఆకర్ కోడు

¹² 'ఈంజ సుబుమ్ కబుర్ నిజుమి దేముడు దిలిసి' మెన సాచి సంగ తుమ్క డిట్టుమ్ కెరుక మెన, జోక 'నిదాసుమ్ తిలో బావొ' మెన సిల్వానన్క నంపజా జోచి అత్తి తుమ్క ఈంజ ఉత్తుమ్ రెడ్డవ అస్సి. ప్రబు దిలి ఈంజ నిజుమ్ జలి దయతె తుమ్ డిట్టుమ్ టీవ.

¹³ దేముడు అమ్క తుమ్క కిసి నిసాన అస్సి గే, దస్సి 'అంచయ్ మాన్సుల్ జతు' మెనయ్ ఈంజ †బబులోను పట్టుమ్తె కి మాన్సుల్క నిసాన అస్సి. జో నిసాన్లిసి ఈంజ సంగుమ్చ కి తుమ్క జోవయించి జోబర సంగితతి. అంక పుత్తు జలో రితొ మార్కు జోచి జోబర సంగితయ్. ¹⁴ ప్రబుచి ప్రేమక తుమ్ ఎక్కిలోక ఎక్కిలో జోకర.

క్రీస్తుచి తెడిచ తుమ్ ఎత్తిజిన్క జోచి సేంతుమ్ తవున్!

† 5:13 5:13 'బబులోను' మెతె, ఏక్ వేల రోమ్ పట్టుమ్క టాలి జతయ్. డీనయ్లిసి 17 అద్యయిమ్చి జా అద్యయిమ్తెచ కొణెచ ఎట్టొచ కొణె దెక.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4